



毋甘你離開

「多謝你陪我。」

「莫按呢講，是我傍你的福氣，才會當參加遮爾濟活動。」

這是舊年佇圓山仔參加活動煞，你共我的手勾咧，對我所講的話。這馬想起來，煞親像是最後的告別。

人恰人之間的緣份實在真奧妙，熟似你是佇咧公車頂。彼時，我看著一个婦人人頭殼犁犁咧看冊，想講這個人無簡單，真認真。想袂到尾仔咱會做伙佇全一站落車，行全路攞是欲去圖書館參加讀冊會。予我閣較想袂到的是，日後你會成做我人生的貴人、我的同事、我的好朋友，咱的緣份就是對彼時開始的。咱做伙教冊，分享教冊的點點滴滴；做伙參加活動、看展覽，食好料的。有一擺，有在地的導覽解說課程，我原本無想欲參加。你共我講，咱愛去聽，上課才有閣較濟物件來教囡仔。毋但干焦教語言，嘛愛予囡仔認捌在地的文化。閣有一擺，咱做伙去考全一間學校，你考牢，我無牢。我想講無牢就準拄好，煞煞去，想袂到你竟然共學校探聽——是按怎我無牢？然後才閣敲電話共我講原因。彼時陣，我感覺真意外，嘛足感心，想講這馬這個流擺，哪閣有人會遮爾好心，毋但會替別人想，閣會主動關心別人。熟似你愈久，我愈確定——真正有，因為你就是。

兩年外前，你雄雄破病，無法度教冊。你袂放心學校的囡仔，共我講，恁學校的囡仔真乖，叫我去教。我照你的話去做，你嘛真歡喜，不時嘛會問我學校的囡仔有乖無？兩年外矣，雖然你身體欠安，定定出出入入病院幾若擺，毋過，你嘛是有去做義工，咱嘛是定定做伙出外參加活動，學真濟物件，日子嘛過甲真快樂。予我相信，雖然身染重病，只要藥仔照食，乖乖仔予醫生看，醫學的進步一定會予你力量。

頂個月，知影你過身，雄雄袂當接受，不時想起你的形影。頂禮拜二，彼工落大雨，我參加你的告別式，我預顛講話，干焦會曉一直拭目屎，告別的話一直無法度講出喙，因為實在是——毋甘你離開。

作者：想想

☆詞彙學習☆

【傍】pāng：依靠、依附、託附。

【婦人人】hū-jîn-lâng/hū-lîn-lâng：婦道人家、婦女。

【犁】lê：低頭的樣子。

【食好料】tsiah hó-liâu：吃大餐、享受美食。

【在地】tsāi-tē/tsāi-tuē：當地、本地。

【認捌】jîn-bat/lîn-bat：學習認識。

【欠安】khiàm-an：不平安、身體不適、生病。

【過身】kuè-sin/kè-sin：過世、逝世、死亡。

【預顛】hân-bān：形容人愚笨、遲鈍、笨拙、沒有才能。